

中华
禅藏

点校本

建中靖国续灯录

绍述祖师法脉传承

证道机缘

直示当体

了达顿悟

宋 惟白 辑
朱俊红 点校

【下】

海南出版社
HAINAN PUBLISHING HOUSE

建中靖国续灯录

宋惟白辑
朱俊红点校

上海古籍出版社

《建中靖国续灯录》卷第十四·对机门

南岳怀让禅师第十三世

洪州翠岩山可真禅师法嗣

东京大相国寺智海禅院真如禅师

讳慕喆。姓闻氏，抚州临川人也。韶龆依建昌军永安院圆觉大师出家受具。后弊衣粝食，介然不群。励志游方，遍参宗匠。晚造翠岩真禅师法席，投机去契，推为上首。始住岳麓大洑，晚奉诏旨住智海禅院。

开堂日，哲宗皇帝遣中使降香。师谢恩毕，登座，拈香祝延圣寿罢，乃敷坐。法云大通禅师白槌竟，师召大众云：“龙楼凤阁，瑞气凝空。五路三街，和风习习。如未相悉，流布去也。祖师西来，直指人心，见性成佛。况在会四众尽是祖师指出底人，还信得及么？若信得及，天上天下随处建立，随处利生，出没卷舒，纵横应用。其或未然，何妨致问。”问：“香烟馥郁，海众云致。为国开堂，如何举唱？”师云：“皇风荡荡。”僧曰：“青山藏不得，明月却相容。”师云：“帝道平平。”僧曰：“凭师一滴曹溪水，四海为霖报我皇。”师云：“真个。”

问：“大法从来倚圣明，此日遭逢有道君。如何是有道君？”师云：“坐致太平。”僧曰：“八方无一事，四海有歌谣。”师云：“不妨道着。”

问：“太平一曲，四海咸闻。不落宫商，如何举唱？”师云：“一二三四五。”僧曰：“木人岭上轻吹处，石女溪边暗点头。”师云：“罕遇知音。”僧曰：“争奈瑞气流沙界，和风满帝城。”师云：“伶俐衲僧。”

师云：“若论此事，岂在如斯一问一答以顺机器？诸祖妙道即不然也。何故？辉腾世界，迥绝见知。函盖相应，丝毫不漏。当人分上，各自圆成。亘古亘今，无增无减。有佛无佛，性相常如。以此举扬，上答皇恩。久立众慈，伏惟珍重。”

问：“赵州庭柏，意旨如何？”师云：“夜来风色紧，孤客已先寒。”僧曰：“先师无此语，又作么生？”师云：“行人始知苦。”僧曰：“十载走红尘，今朝独露身。”师云：“雪上加霜。”

问：“如何是城里佛？”师云：“万人丛里不插标。”僧曰：“如何是村里佛？”师云：“泥猪疥狗。”僧曰：“如何是山里佛？”师云：“绝人往还。”僧曰：“如何是教外别传？”师云：“翻译不出。”

问：“牛头未见四祖时如何？”师云：“寒毛卓竖。”僧曰：“见后如何？”师云：“额头汗出。”

上堂。拈拄杖云：“智海拄杖，或作金刚王宝剑，或作踞地师子，或作探竿影草，或不作拄杖用。诸人还相委悉么？若也悉去，如龙得水，似虎靠山。出没卷舒，纵横应用。如未相悉，大似日中逃影。”

上堂云：“扪空追响，劳汝心神。梦觉觉非，竟有何事。德山老人在你诸人眉毛眼睛上，诸人还觉么？若也觉去，梦觉觉非。若也未觉，扪空追响，终无了日。直饶向遮里倜傥分明，犹是梯山入贡。还有独游方外者么？”良久云：“且莫诈明头。参。”

上堂云：“山僧本无积蓄，且得粥足饭足。困来即便打睡，一任东卜西卜。”

上堂云：“看风使帆，诸人尽知。斩钉截铁，要在当机。且道不伤物义一句作么生道？”良久云：“举头天外看，谁是个中人。参。”

师于绍圣二年十月初八日写偈云：“昨夜三更，风雷忽作。云散长空，前溪月落。”偈毕，坐逝。茶毗烬余，睛目爪齿坚然如故。分葬于京潭二塔，余如大丞相曾公布塔铭。

南岳西林崇奥禅师

问：“一问一答，宾主历然。不问不答，如何辨别？”师云：“坐底坐，立底立。”僧曰：“便恁么会时如何？”师云：“舌拄腭。”僧礼拜，师云：“不得讳却。”

师云：“南斗六，北斗七，波斯眼睛黑似漆。堪笑峰前桧与松，被风吹动鸣飐飐^①。更有一湾流水清，接竹引来闹啾啾。闹啾啾，观音普贤共相揖。共相揖，日日日从东畔出。团^②。是什么说话？”良久云：“波斯鼻孔长三尺。”

袁州杨岐山方会禅师法嗣

舒州白云山海会院守端禅师

衡阳周氏子也。生而异相，遂舍出家。笃志参玄，勤询学问。法悟杨岐，名播宗席。语要颂古，诸方盛传。今也虽亡，道风益扇。

开堂日，上首白槌竟，师顾视左右云：“便恁么散去，自古自今如麻似粟。若言更有如何若何，曹溪一路平沉。从上诸圣皆向火焰里垂手，只要诸人眼横鼻直。众中莫有垂

① 飐：音瑟。秋风。

② 团：音或。用同“咄”。

手者么？出来辨看。”问：“欲行千里，一步为初。如何是最初一步？”师云：“过遮边来。”僧曰：“谓言侵早起，更有夜行人。”师云：“未敢相许。”僧便喝，师云：“咦。”

问：“二师相见，合谈何事？”师云：“六耳不同谋。”僧曰：“谢师答话。”师云：“听事不真。”

上堂云：“入林不动草，入水不动波，遮个是把缆放船手脚。且道衲僧分上又作么生？”良久云：“掀翻大海求知己，道合乾坤见太平。”

上堂云：“运用与去来，何曾有间隔。山僧数日出山行履，每日折旋俯仰，瞒诸人一点不得。诸人在院折旋俯仰，瞒山僧一点不得。山僧为什么见似不见？要会么？是处有芳草，何山无白云。咄。”

金陵保宁仁勇禅师

俗姓竺氏。明州人也。受具游方，始参泐潭。迨逾一纪，疑情未息。次扣云盖会禅师，发明心印。出世保宁，二十余年唱扬祖道。

问：“如何是佛？”师云：“铁锤无孔。”

问：“如何是道？”师云：“泥里有刺。”僧曰：“如何是道中人？”师云：“切忌蹈着。”

问：“如何是祖师西来意？”师云：“雪上加霜。”

问：“知师解把无星称，无角铁牛重几多。”师云：“头轻尾重。”僧曰：“此犹是对面相瞒。”师云：“与天下人作榜样。”僧曰：“恁么则人平不语，水平不流。”师云：“犹较些子。”

问：“灵山如指月，曹溪如话月。未审保宁门下如何？”师云：“嘎。”僧曰：“有花当面贴。”师便喝。

问：“摘叶寻枝即不问，如何是直截根源？”师云：“蚊子上铁牛。”僧曰：“直截根源人已晓，中下之流如何指示？”师云：“石人脊，汗通流。”

问：“如何是尘中自在底人？”师云：“因行不妨掉臂。”僧曰：“如何是佛法大意？”师云：“镬汤无冷处。”

上堂云：“释迦出世，弄假像真。达磨西来，将长就短。德山棒、临济喝，阳焰充饥，梅林止渴。清平世界不妨夜行。如今莫有吞却佛祖，打破化城者么？”良久云：“今日被大众勘破。”

上堂云：“来也来也。”良久云：“去也去也。”

上堂云：“满口是舌，都不能说。碧眼老胡，当门

齿缺。”

上堂云：“看看，山僧入拔舌地狱去也。”以手拽舌云：“阿哪阿哪。”

上堂云：“相骂无好言，相打无好拳。大众，直须恁么，始得一句句切害，一拳拳着实。忽然打着个无面目汉，也不妨畅快杀人。”

上堂。侍者烧香罢，师指侍者云：“侍者已为诸人说法了也。”

上堂云：“百川异流，同归于海。万途差别，皆入此宗。”卓拄杖云：“医得眼下疮，剜却心头肉。”

上堂云：“曹溪路上，野老讴歌。古佛堂前，行人舞袖。脚踏实地，天下人知。鼻孔辽天，作么生辨？”乃云：“无孔笛吹玄外曲，五湖何处觅知音。”乃拍一下。

上堂云：“山僧二十余年挑囊负钵，向寰海之内参善知识十数余人，自家并无个见处，有若顽石相似。参底尊宿亦无长处可相利益。自此，一生只作个百无所解底人。幸自可怜生，忽然被业风吹到江宁府，无端被人上当推向十字路头，住个破院子，作粥饭主人，接待南北。事不获已，随分有盐有醋，粥足饭足。且与么过时，若是佛法，不曾梦见。”

岳州幕阜山长庆显琮禅师

问：“如何是佛？”师云：“泥龕塑像。”僧曰：“如何是法？”师云：“黄卷赤轴。”僧曰：“如何是僧？”师云：“更问阿谁？”僧曰：“如何是向上事。”师云：“幕阜山高。”僧曰：“毕竟如何？”师云：“高系布裙。”

岳州君山守巽禅师

问：“山高水深即不问，如何是君山境？”师云：“山高水深。”僧曰：“如何是境中人？”师云：“渔翁鼓棹。”僧曰：“宗乘事若何？”师云：“岳阳楼望洞庭湖。”

澧州钦山乾明智因禅师

问：“如何是道？”师云：“步步踏着。”僧曰：“如何是道中人？”师云：“眼眼相覷。”

问：“如何是和尚家风？”师云：“锦绣银香囊。”僧曰：“客来如何祇待？”师云：“硬糊饼，烂𩚑𩚑^①。”僧曰：“佛法事如何？”师云：“人情浓厚道情微。”

① 𩚑𩚑：音博托。饼子。

潭州石霜山守孙禅师

问：“生也不道，死也不道。为什么不道？”师云：“一言已出。”僧曰：“从东过西又作么生？”师云：“驷马难追。”僧曰：“学人总不与么。”师云：“易开终始口，难保岁寒心。”

师云：“秋风飒飒，秋雨微微。败叶纷飞，岭云缭绕。于此明得，善财入弥勒楼阁，帝网重重，互相涉入。于此未明，且莫迷头认影，止宿草庵。如斯话会，曲为初机。明眼高流，共相证据。噫。什么说话？”良久云：“云在岭头闲不彻，水流涧下太忙生。参。”

明州天童山清遂禅师法嗣

福州乾元寺了觉禅师

开堂日，上首白槌竟，师良久云：“直饶阿那律天眼，未解谛观。便是千手大悲，焉能提掇。众中莫有不甘者么？出来掀倒禅床，约散大众。然虽如是，未是作家。且于第二门中与衲僧出气。”

问：“少林九年垂一语，直至如今赚举。欲得不赚，便请师举。”师云：“俺。”僧曰：“摩哒哩伽，摩哒哩智又作么生？”师云：“放你三十棒。”

问：“尊者证果，超越圣流。不涉重修，请师速道。”师云：“落花檐外朵，青柳槛前梢。”僧曰：“一雨周沙界，群心永夜稣。”师云：“水不洗水一句作么生道？”僧曰：“应知松柏操，不改岁寒心。”师云：“且信一半。”

问：“未离兜率，已降王宫。未审是什么人？”师云：“牛头出，马头回。”僧曰：“未审是法身？报身？”师云：“牵犁拽杷。”

师顾视大众云：“还相委悉么？若不相悉，山僧今日指鹿为马，唱九作十，瞒诸人去也。摩竭正令，水泄不通。少室真规，风吹不入。圣凡情尽，体露真常。迥绝见知，辉腾今古。良由情存圣量，随在见知。所以听不出声，见不超色，纵灭一切见闻觉知，内守幽闲，犹为法尘分别影事；造种种业，轮回异趣；往而不返，真可悲哉。若能回光返照，有何佛道可成，众生可度？便能向火焰里藏身，东涌西没；于微尘上走马，同死同生。若向遮里见得彻，参得透，切忌认驴鞍桥作阿爷下颔。”

南岳应天万寿应城^①禅师

师初参净慈遂禅师。遂问：“上人从何而来？”师云：“毗陵来。”遂云：“我闻毗陵出好草虫扇子，带得来否？”师

^① 城：音成。

作一圆相，师云：“大善知识又要遮个作什么？”遂云：“只遮个，此间亦要得。”师于言下大悟。

上堂云：“山花狼藉，孤负空生。山草离披，拈起室利。惊得岳神稽首，土地和南；陕府铁牛无放处，嘉州石像露全身。如斯说话，错会者多。敢问诸人，不涉春缘一句作么生道？”良久云：“不得春风花不开，花开又被风吹落。咄。”

福州大中立志禅师

问：“握骊珠于掌上，鉴十方于目前。学人上来，请一师鉴。”师云：“草贼大败。”僧云：“学人今日失利。”师云：“自知较一半。”僧便喝，师云：“强惺惺。”

问：“远趋丈室，仰慕宗风。学人上来，请师一接。”师云：“高挂钵囊。”僧曰：“便是为人处也无？”师云：“盲人摸地。”僧曰：“莫厌良为贱。”师云：“短贩樵人，徒夸书剑。”

问：“马祖升堂，百丈卷席，未审古人意旨如何？”师云：“官马相踏。”僧云：“学人今日小出大遇。”师云：“拄杖未曾拈着。”

上堂云：“猿啸乌山之畔，众兽潜藏。云生螺渚之间，群峰失色。太阿宝剑，耀日争辉。樵父船柴，医王辨价。还有不顾宾主者，出来道看。”良久云：“水冻鱼难跃，天寒

草发迟。”以拄杖打香台一下。

上堂云：“法不见法，法不行法，法不知法。大众，遮个是香炉子，如何是不见、不行、不知？百亿恒沙世界诸佛尽在香炉上放光动地，说法度人，诸人还见么？直饶见得，也涉踟蹰。咄。”

师于绍圣元年三月十一日集众，沐浴净发，写偈云：“麒麟掣断黄金锁，玉兔冲开白玉关。好是无云中夜后，一轮明月照躔山。”偈毕，趺坐而逝。荼毗，获舍利。塔葬本山。

金陵蒋山赞元觉海禅师法嗣

衢州江山县石门罗汉禅院雅禅师

问：“雷音一震，龙象咸臻。学人上来，请师举唱。”师云：“莲目瞬时千界静，金颜笑处一花新。”僧曰：“人天尽入罗峰境，今日亲闻端的音。”师云：“百万茫茫人不知。”

问：“佛未出世时如何？”师云：“东宫玉殿无遗影。”僧曰：“出世后如何？”师云：“毗蓝园畔雨天花。”僧曰：“与么则逾春城于八夜，栖雪岭于六年。”师云：“威音王已前作么生？”僧曰：“且待别时。”师便打。

问：“如何是祖师西来意？”师云：“熊耳塔开空寂寂，

唯留只履冒轻埃。”

问：“如何是和尚家风？”师云：“一条筇竹杖，三事衲鬘衣。”僧曰：“客来将何祇待？”师云：“酌泉酺点祖师茶。”

上堂云：“茱萸鲜嫩菊花香，畅杀陶家醉酒郎。我辈泛觞虽绝分，东篱闲玩也无妨。大众，闲玩即不无，且道眼在什么处？知有底，眉毛眼上横。未谙者，红黄里乱走。阿呵呵，今日元来九月九。咄。”下座。

信州龟峰瑞相子琼禅师

问：“如何是博山境？”师云：“涧流淥水，路出松门。”僧曰：“如何是境中人？”师云：“身着红绡衣，肚中黑如漆。”僧曰：“向上宗乘事若何？”师云：“刹竿头指天。”

问：“青春已过，夏景暄繁。时节因缘，请师为说。”师云：“腊月二十五，未是拜年时。”僧曰：“学人未晓，乞师再指。”师云：“石人身上不生毛。”

金陵蒋山可政禅师

问：“如何是道？”师云：“不许夜行。”僧曰：“如何是道中人？”师云：“投明须到。”

问：“如何是向上事？”师云：“一人泉在最高峰。”

潭州开福守义禅师法嗣

庐州澄慧惟𦉰^①禅师

问：“向上宗乘，请师举唱。”师云：“有问有答。”僧曰：“如同昔日空生问，一似当初善逝酬。”师云：“无问无答。”僧曰：“一句蒙师指，三拜谢师恩。”师云：“静处萨婆诃。”

问：“蹈破澄潭月，穿开碧落天。不顾危亡，乞师指示。”师云：“斋后钟。”僧曰：“青山无异路，智辨在当人。”师云：“直须子细。”僧应喏，师云：“跔跳。”

南岳云峰文悦禅师法嗣

桂州寿宁齐晓禅师

问：“大众云臻，合谈何事？”师云：“波斯人闹市。”僧曰：“恁么则草偃风行。”师云：“万里望乡关。”

问：“如何是佛？”师云：“着衣吃饭。”僧曰：“叉手当胸，退身三步。”师曰：“醉后添杯。”

上堂云：“触目不会道，犹较些子。运足焉知路，错下

^① 𦉰：音丙。同“炳”。

名言。诸仁者，山僧今日将错就错。汝等诸人见有眼，闻有耳，嗅有鼻，味有舌，因什么却不会？”良久云：“武帝求仙不得仙，王乔端坐却升天。咄。”

庐州澄惠咸诤禅师

问：“德山入门便棒，万古宗风。临济入门便喝，古今榜样。去此二途，请师拈掇。”师云：“我总不与么。”僧曰：“一言启口，别是家风。”师云：“赖遇拄杖不在手。”

问：“有问有答，善巧分张。向上宗乘，请师别道。”师云：“阁梨问得最亲。”僧曰：“学人会也。”师云：“会个什么？”僧举起坐具，师云：“毕竟作么生？”僧便喝，师云：“作家。”僧礼拜，师便喝。

师云：“如来秘旨，岂涉辞锋。祖师心印，徒劳穿凿。若举宗乘一字，海水逆流，须弥倒卓。若说佛说祖，三界平沉，四生何有。若向下商量，枯木生花，寒灰发焰。然虽如是，若向衲僧门下，白云千里万里。且道衲僧有什么长处？”良久云：“更有一般堪羨处，长连床上带刀眠。”

南岳福严保宗禅师法嗣

衡州花药山崇胜义然禅师

问：“临济血脉，请师直道。”师云：“虚空里扬眉，默地